



basic education

Department:
Basic Education
REPUBLIC OF SOUTH AFRICA

SENIOR CERTIFICATE EXAMINATIONS/ NATIONAL SENIOR CERTIFICATE EXAMINATIONS

SISWATI LULWIMI LWEKUCALA LWEKWENGETA (FAL)

LIPHEPHA LEKUCALA (P1)

2019

EMAMAKI: 80

SIKHATSI: Ema-awa 2

Leliphepha linemakhasi la-12.

TICONDZISO KULABAHLOLWAKO

1. Leliphepha lehlukaniwe TIGABA LETINTSATFU:
SIGABA A: Siviso (30)
SIGABA B: Sifinyeto (10)
SIGABA C: Takhi netimiso tekusetjentiswa kwelulwimi (40)
2. Phendvula YONKHE imibuto ngeSiswati.
3. Cala LESO NALESO SIGABA ekhasini LELISHA.
4. Dwebela ekugcineni KWALESO NALESO SIGABA.
5. Tinombolo tetimphendvulo atihambisane naleto letisephepheni lemibuto njengobe tinjalo.
6. Shiya umugca emkhatsini wetimphendvulo takho.
7. Caphelisisa sipelingi/lupelomagama nendlela lewakha ngayo imisho.
8. Kwehlukaniwa kwesikhatsi:
SIGABA A: Emaminithi 50
SIGABA B: Emaminithi 20
SIGABA C: Emaminithi 50
9. Bhala ngebunono nangesandla lesifundzekako.

SIGABA A: SIVISISO

UMBUTO 1

1.1 Fundza letheksthi bese uphendvula imibuto lelandzelako.

ITHEKSTHI A

KUTSANDZA IMALI

- 1 LaNdlela uhleli nemngani wakhe LaMotsa bayacoca. Bakhuluma ngendzaba yemalobolo ebantfwana, phela LaNdlela unemantfombatana lamabili boBonakele lesewalotjolwa naJabulile lotawulotjolwa nje masinyane. BoLaNdlela naLaMotsa bahlala lapha eMatsulu, emakhaya abo asondzelene nobe ahlukaniswa tindlu letintsafu. LaNdlela utsi yena angeke avume indvodzakati yakhe Jabulile ilotjolwe ngumuntfu longacaci kahle, phela ukhuluma kubonakale kutsi loku lakukhulumako kuphuma ekujuleni kwenhlitiyo yakhe. Ukhuluma uhleli esitubhini nemngani wakhe LaMotsa. Babuka bafana nemantfombatana lamanecane ladzakiwe lagcwele sitaladi. Ufola balengise emabhuluko. Bahamba bagcwele sitaladi shengatsi ngesabo basitsenga ngemali leshisiwe. 5
- 2 'Ungakhulumi njalo LaNdlela ngobe lutsandvo aluboni, kungenteka utfole umkhwenyane lofana nabo laba lesibabona lapha esitaladini. Kulesinye sikhatsi kungenteka nje kutsi munye wabo utsandzana naJabulile indvodzakati yakho,' kusho LaMotsa. LaNdlela wamtjela kahle umngani wakhe kutsi yena angeke avume kwenteke loko emntfwaneni wakhe. Wadzimate wametsembisa nekutsi yena angatfaka emlilweni lovutsako ashe aphele nakungenteka kuye loko. 15
- 3 LaMotsa wamyala umngani wakhe kutsi abokwati kutsi tonkhe tintfo sitifola kuMdali, labanye banebakhwenyane labafundzile labenta imisebenti lemihle, labanye banebakhwenyane lababosidlani kantsi labanye banebakhwenyane lababomadzakeni. Umecwayisa kutsi angakhulumi ngalendlela ngobe utaticalekisa atfole umkhwenyane longumadzakeni. 20
- 4 LaMotsa wabuta kumngani wakhe kutsi ufuna tingaki tinkhomo nakulotjolwa Jabulile. LaNdlela wamtjela kutsi ufuna tinkhomo letilishumi natimbili, inkhomo yinye itawubita tinkhulungwane letimbili. Wakhuta umhlolo LaMotsa nakeva kutsi kantsi umngani wakhe ufuna imali lengaka. Wafisa nekwati kutsi ufuna kwentani ngalemali lengaka. Basachubeka bacoca kwavela nekutsi Jabulile utawulotjolwa nje kulo leliviki lelitako. Ulotjolwa bakaKhumalo eNgodini, babantfu labanjingile futsi labanemabhezini. Umkhwenyane wakhe phela wafundza naye Jabulile enyuvesi, usebenta ehovisi lebameli balapha eMpumalanga. LaNdlela wamchazela umngani wakhe kutsi yena nemyeni wakhe sebabuya egalaji kuyobuka imoto lebatayitsenga ngalemali futsi umyeni wakhe ufuna kutsenga i-BMW 735i. Watama konkhe lokusemandleni akhe LaMotsa kutsi abonise umngani wakhe. LaNdlela wacinisa inhloko, watjela LaMotsa kutsi ucondze kona simo selive sisihle nakangaka, bona bavunywe ngumhlaba njengabhatata. 35

5	Indzaba yemalobolo bayicoca yate yefika lapho LaNdlela abona khona kutsi kuhle kucocisana nabomakhelwane. Loko kwenta babone imphumelelo lelapha kakhe. Phela bekasho njalo ngemlomo kantsi ngekhatsi bese icala kumudla inkhulumo yaLaMotsa. Watsi nakavalelisa ahamba LaMotsa wamshiya nemagama latsi, 'umendvo awutfunyelwa gundwane'. Wasala wathula sikhatsi lesidze LaNdlela wabonakala kutsi umcondvo wakhe usekujuleni. Empeleni wayibona lentfo leshiwo nguLaMotsa kutsi itawudala umsindvo ebantfwaneni bakhe. Ingani Bonakele walotjolwa ngemali lencane kabi manje Jabulile sekumele bamlobole ngemali leningi.	40 45
6	Kulotjolwa kwaBonakele ngemali lephasi kusho kungatsandvwa nekutsatseleka phasi. Kulotjolwa kwaJabulile ngemali lenyenti kusho kutsandvwa nekuba ligugu. Jele ubitwe imali lencane ngobe achamuka emakhaya kaHhoyi. Kantsi Khumalo ubitwe imali leningi ngobe achamuka elokishini eNgodini futsi anemabhizinisi. Jabulile beyimkhatsata kakhulu indzaba yemalobolo akhe labita kangaka. Kukhatsateka kwakhe kwamenta waba shengatsi ulahlekelwa yingcondvo kancane. Abehlala athulile atse dvu. Kulesinye sikhatsi abebonakala akhuluma yedwana njengeluhlanya. Injabulo kuye beyicedvwa batali bakhe labatsandza imali. Abefuna kukhuluma nababe wakhe kodvwa ehlulwa ngumtsetfo longamvumeli kutsi ahlale nababe wakhe bacoce tindzaba. Make wakhe abetimisele kumsita ngobe naye abesamkhombisile LaMotsa liphutsa lebebefuna kulenta nendvodza yakhe. Kepha nobe afuna kumsita Jabulile, utalicala ngakuphi lelibhubesi lelingubabe waJabulile. Phela tincwadzi temoto egalaji besetibita ligama lakhe. Egalaji besebalindzele imali latayiletsa ngeMsombuluko ngemuva kwemalobolo.	50 55 60 65

[Itsetfwe encwadzini: *Siyaticeketsa*, Likhasi 65]

- 1.1.1 Khetsa YINYE imphendvulo. Bhala lamagama ngetinombolo. 'Tinkhulungwane letimbili':
- A R22 000
B R2 000
C R20 000
D R2 200 (1)
- 1.1.2 Ngubani ligama lalentfombi letawulotjolwa kuletheksthi? (1)
- 1.1.3 Bhala ligama lemoto lebeyitawutsengwa boLaNdlela nendvodza yakhe. (1)
- 1.1.4 Bhala loko lokushiwo endzabeni lokufakazela kutsi boLaNdlela naLaMotsa bebabomakhelwane. (1)
- 1.1.5 Catsanisa tindzawo lebachamuka kuto boJele naKhumalo. (2)
- 1.1.6 Ngabe kukhombisani kulotjolwa kwaBonakele ngemali lephasi? Bhala emaphuzu LAMABILI. (2)
- 1.1.7 Chaza kutsi ngumuntfu lonjani lobitwa ngekutsi, 'libhubesi'. (2)
- 1.1.8 Ngabe ngumbono nobe liciniso kutsi labo labafundze kakhulu kumele balotjolwe ngemali leningi? Sekela ngemaphuzu LAMABILI. (2)

- 1.1.9 Ngusiphi sento lesentiwa batali baJabulile lesifakazela kutsi benta tintfo ngekujaka? (2)
- 1.1.10 Ngekubona kwakho kukahle yini kulobola ngembi kwekushada umfati? Sekela. (2)
- 1.1.11 Nawufundza lethekesthi inkhulumo yaLaMotsa imveta angumakhelwane lonjani ngekwesimilo? Bhala emaphuzu LAMABILI. (2)
- 1.1.12 Nakungatsiwa wena bewungumtali, bewungayenta njani imali lekulotjolwe ngayo umntfwanakho? Bhala emaphuzu LAMABILI. (2)
- 1.1.13 Indzawo yasemakhaya nobe elokishini ayikhombisi kutsi uphuyile nobe unjingile. Sekela lombono. (2)
- 1.1.14 Ngekubona kwakho ngabe ngutiphi tizatfu LETIMBILI letenta batali baJabulile bafune kutsenga imoto? (2)

1.2 Fundzisa lesitfombe bese uphendvula imibuto lelandzelako.

ITHEKSTHI B



[Itsetfwe ku-www.google.com]

- 1.2.1 Khetsa YINYE imphendvulo. Ibitwani indzawo lapho kugcinwa khona tilwane letifana naletikulesibonwa? (1)
- A Sikhungo
B Sibaya
C Siciwi
D Sidleke
- 1.2.2 Yini lesikutfolela kuletilwane lokulusito? (1)
- 1.2.3 Bhala TIMBILI tinhlobo tetilwane letikhonjiswe kulesibonwa. (2)
- 1.2.4 Ngabe kuyakholeka yini kutsi letilwane letikulesibonwa tiyadlalisana? Sekela. (2)

SAMBA SESIGABA A: 30

SIGABA B: SIFINYETO

UMBUTO 2

Fundza lethekesthi bese uyifinyeta ngemagama langengci kula-60 uvete emaphuzu lasikhombisa lameyelana **nekuphila imphilo lengenastress**.

CAPHELA

1. Sebentisa emagama AKHO.
2. Imisho yakho ayibe netinombolo kusuka ku-1 kuya ku-7.
3. Bhala liphuzu LINYE emshweni ngamunye.
4. Khombisa linani lemagama lowasebentisile ekugcineni kwesifinyeto uwafake kubakaki.

ITHEKSTHI C

KUPHILA IMPHILO LENGENA-STRESS

Wonkhe umuntfu kufanele akwati kulawula *stress* ngobe nawungahluleka kusilawula singaphazamisa imphilo yakho siphindze sikhohlelele etintfweni letifana nekuhlala wetfukile, kuphelelwa butfongo kanye nekukhuluphala. Chumana nalabanye bantfu basemphakatsini, uhlale ucoce nebangani nobe uye esontfweni. Loko kukunika litfuba lekwehlisa *stress* ngobe nawusemkhatsini webantfu uyacoca ukhohlwe ngetinkinga lonato.

Tfola incwadzi lotayifundza. Kufundza tincwadzi kukwenta uvuleke ingcondvo ukhohlwe ngetintfo letinyenti. Kufundza kunika ingcondvo yakho emandla. Nawufundza ngentfo letsite ingcondvo iba kuloko lofundza ngako njengekufundza ngemuntfu lophumelele kakhulu emphilweni. Kufundza kukwenta utive nawe uphumelela nobe ube naleyo nshisekelo yekuphumelela.

Ngalesinye sikhatsi nawuva uphetfwe *stress* kuyasita kutsi uphumule, ungayi emsebentini nobe uvakashela letinye tindzawo. Kuvakashela letinye tindzawo kutakwenta utive ushayelwa ngumoya. Kutakusita kutsi uphumule kunekutsi ubone tintfo letifanako nebantfu lobetayele onkhe emalanga.

Kunyakatisa umtiba kuyalehlisa lizinga le-*stress*. Akudzingi kutsi uye ejimini nangabe ungenayo imali. Kungena emgwacweni uhambe libanga lelidze, ugijime nobe wente i-*yoga* kunguletinye tintfo letingakusita ekwehliseni *stress*. Yenta tintfo letehlukile ngobe kuhlala wenta intfo yinye onkhe emalanga kuyasibanga *stress*. Khumbula tintfo lebewutenta kudzala, loko kutakwenta ukhumbule nemakhono lonawo kukwente uyijabulele imphilo.

Tinakekele ngekutsi ulale kahle uphumule. Bantfu labanyenti kulesikhatsi lesiphila kuso abalali kahle, babukela mabonakudze kuze kube sebusuku. Balala sikhathana nje kube sekusile sekumele bavuke baye esikolweni nasemisebentini. Labanye badlala ema-*games* kumaselula baphindze bangene ku-*facebook* naku-*twitter*. Labanye bafonelana busuku bonkhe ngobe banemaminithi ekufona mahhala. Konkhe loku kwenta bantfu bangakhoni kulala baphumule bese bagcina baba ne-*stress*.

Dlani kudla lokunemphilo wentele kutsi umtimba wakho uhlale uphilile. Kudla lokunemafutsa lamanyenti kwenta umtimba uhlale udziniwe. Cinisekisa kutsi udla tibhidvo ngalokwenele. Dlani titselo letinyenti uphindze unatse nemanti ngalokwenele. Bantfu labanyenti bayatsandza kunatsa ema-cold drinks bese balinyatwa ngule esidi letfolakala kuwo.

[Itsetfwe kuBona yaKholwane 2017, likhasi 34]

SAMBA SESIGABA B: 10

SIGABA C: TAKHI NETIMISO TEKUSETJENTISWA KWELULWIMI

UMBUTO 3: SIKHANGISI

Fundza lesikhangisi bese uphendvula imibuto lelandzelako.

ITHEKSTHI D

UKE WEVA NGE-GENTLE MAGIC? YITSENGE KHONA NAMUHLA!



- ❖ Yentiwe ngemakhambi esintfu.
- ❖ Yenta sikhumba sibe busheleleti.
- ❖ Ngiyo kuphela lecedza ematjitji, emabala lamnyama ebusweni.
- ❖ Ugeza ngensipho, ushikishe iloshini, utiphafe ngekhilimu.
- ❖ Netinswane tiyayisebentisa.
- ❖ Itsenjwa bodokotela kuphela.
- ❖ Iyatfolakala kuto tonkhe titolo takuleli.

[Itsetfwe: www.faceproducts.za]

- 3.1 Kungani leligama lelitsi, 'Gentle Magic' livela kaningi kulesikhangisi? (1)
- 3.2 Khetsa YINYE imphendvulo. Lenkhulumo letsi, 'itsenjwa bodokotela kuphela' iluhlobo luni? (1)
- A Lenhlangotsilunye
B Lenhlangotsimbili
C Lenhlangotsinyenti
D Lehlekisako (1)
- 3.3 Bhala umusho lonenkhumo lehungako losesikhangisweni. (1)
- 3.4 Nguyiphi inkhumo lengasilo liciniso lekulesikhangisi? (1)
- 3.5 Bhala sifinyeto seligama lelidwetjelwe emshweni longentasi. (1)
- Itsengwa bodokotela kuphela. (1)

- 3.6 Bhala ligama lelichaza libito emshweni longentasi. Emabala lamnyama asebusweni. (1)
- 3.7 Bhala KUBILI lokwenta lesikhangisi sihehe. (2)
- 3.8 Sebentisa ligama, 'litjiti' emshweni lotakhele wona livete inshokutsi lehlukile kunalesesikhangisweni. (2)
[10]

UMBUTO 4: IKHATHUNI

Fundza lekhathuni bese uphendvula imibuto lelandzelako.

ITHEKSTHI E



[Itsetfwe: Commitstrip.com]

- 4.1 Ngukuphi lokufanako kulabantfu labakulekhathuni? Bhala KUNYE. (1)
- 4.2 Phindza ubhale lomusho longentasi bese ugucula ligama lelidvewetjelwe likhombe khashane. (1)
- Uyasibona lesi asifuni kungena.

- 4.3 Kungani inkhulumomabhamuta lesefreyimini 4 ibhalwe ngalokwehlukile? (1)
- 4.4 Bhala inkhulumo letsatfwa njengemaciniso ibe itsintsa imiva yalabanye lesefreyimini 4. (1)
- 4.5 Bhala inkhulumo letsatsa luhlangotsi lesefreyimini 1. (2)
- 4.6 Phindza ubhale lomusho longentasi ube sebunyentini.
Lesi asifuni kungena kulamafreyimu. (2)
- 4.7 Bhala KUBILI lokukhombisa kutsi lomuntfu lothayiphako efreyimini 1 umangele. (2)
- [10]**

UMBUTO 5: IPHROZI

- 5.1 Fundza lethekesthi bese uphendvula imibuto lelandzelako.

ITHEKSTHI F

LILANGA LEMSHADO

Wacala kuveta lemhlatsi kantsi konkhe loku abeva buhlungu kungabonakali nekutsi lamuhla lilanga lelikhulu emphilweni yakhe. Vusimuzi bekahleti nasibali wakhe Mfelani endlini yekuphumula. Bahleti bobabili nje abafuni kuphazanyiswa ngulabanye bantfu labete kulomshado.

Bachubeka nengcoco kwase kungena LaKhoza atobatisa kutsi uMfundisi 5 ubacela kwesikhashana kutsi bathandaze ngembikwekutsi bacale kudla. Nembala baya lapho babitwa khona. Kwangena intfombi lebeyiletse litiya, yefika yabanika bachubeka-ke netindzaba kodvwa beva banatsa leliya.

'Sibali, wota utewuhlala lapha endzaweni yakho, nayi inkomishi yakho lebewunatsa ngayo.' Kusho Vusimuzi kuMfelani. 'Hhayi mani sibali kuyafana 10 nome ngihleti lapha,' kuphendvula Mfelani. 'Ingani nguwe lobewutsi awufuni kunatsa enkomishini lebeyinatsa mine,' kuchubeka Mfelani. 'Angikasho njalo mine sibali,' kuphika Vusimuzi ashobelisa nenhloko. 'Hhayi ngimane ngiyatidlalela Mkhwenyewetfu.'

[Itsetfwe encwadzini *Emalangabi*, likhasi 92–93]

- 5.1.1 Bhala ligama leliso sinatfo emshweni longentasi.
Kwangena intfombi lebeyiletse litiya. (1)
- 5.1.2 Hlanganisa lemisho lelandzelako ibe ngumusho munye.
Vusimuzi naMfelani bahleti bobabili. Abafuni kuphazanyiswa ngulabanye bantfu labete kulomshado. (1)
- 5.1.3 Cala lomusho longentasi ngekutsi, 'Cha'.
Vusimuzi bekahleti nasibali wakhe. (1)
- 5.1.4 Bhala inchazelo leyehhlukile yeligama lelidvwetjelwe emshweni longentasi.
Vusimuzi ushobelisa inhloko. (2)

- 5.1.5 Cala lomusho ngeligama lelikubakaki.
Kuphika Vusimuzi. (Itolo) (1)
- 5.1.6 Bhala umcondvo losebaleni walenkhumo.
Kuveta lemhlatsi. (2)
- 5.1.7 Phindza ubhale lomusho ucale ngeligama lelidvvetjelwe.
Intfombi beyiletse litiya. (2)
- 5.1.8 Lungisa emaphutsa esipelingi kulomusho lolandzelako:
Bachubeka nengcoco sikhashana kwase kungena lakhoza. (2)
- 5.1.9 Bhala lomusho longentasi ube yinkhulumombiko.
'Hlala lapha,' Kusho Vusimuzi. (2)

5.2 SITFOMBE

Fundza lesitfombe bese uphendvula imibuto lelandzelako.

ITHEKSTHI G



[Itsetfwe: www.cartoons.za]

- 5.2.1 Khetsa YINYE imphendvulo. Bhala mcondvofana walelibito lelidvvetjelwe kulesitfombe.
A Umtfunti
B Umhlaba
C Umbutsano
D Umtsimba (1)
- 5.2.2 Phindza ubhale lomusho ulungise ligama lelikubakaki likhombise buncane bentfo.
Kukhulunywe kabanti ngekongiwa (kwemanti.) (1)

- 5.2.3 Gucula lomusho lolandzelako ube ngumbuto.
Umhlangano uhambe kahle. (1)
- 5.2.4 Kungani ligama lelidvwetjelwe libhalwe ngalokutjekile emshweni
lolandzelako:
Ngisayobheja i-*Lotto*. (1)
- 5.2.5 Yakha umusho ngeligama lelidvwetjelwe emshweni longentasi
livete umcondvo lobhacile.
Umuti wakho ukulindzile. (2)
[20]
- SAMBA SESIGABA C 40**
SAMBA SAKO KONKHE: 80